

Ia fa`ata`alolo ia le paia tele o le la`au ma ona lau. E leai se na te gafa fa`amatua o faiva le mamalu ma le paia o` a iga, `au`auna a le Atua i ona fata faitaulaga e fia o lo`o tala fa`auto i tulimanu e fa o Aotearoa. Ou te le ta i utuma`au, aua o paia ma mamalu o Samoa e o`o lava i le fa`avavau. Tulou! Tulou! Tulou lava!

Fa`amua sa tatou fa`apolo ma se fa`asagi i le tapa`au i le lagi, ua talia fa`autuga tagi, ua ta`o`oto peau o le sami moe fo`i mata matagi. Ua le tu lia afega, le tu lia ala, ua malaga ti`a i ulupaga, o le ua mua i tai mua i utaga, ua tau le `ai e pei o le upu i le tavasaga.

O lenei galuega sa `ili`ili sa mata`itu ina ai le gagana fa`aaoga ina i le a`oa`oina o alo ma fanau, o le aoga , po o le le aoga o la latou lava gagana mo lo latou a`oa`oina. O finagalo tufafa`asoa ma manatu fa`aalua, o lo`o alia`i mai ai i lenei galuega sa `ili`ili, le mana`omia pea o lona fa`aauauina. E laualuga i le fa`amoemoe se tasi galuega sa`ili`ili e tele atu i lo lenei, o le`a mafai ai ona maua ni fa`asinoala mo i tatou, ina ia fa`ata`atitia ni alafua manino mo le lagolagoina o a`oa`oga a le fanau, ma o le`a aofia ai le lagolagoina malosi o a tatou lava gagana.

E momoli atu la matou fa`afetai tele i le paia ma le mamalu, fa`apitoa ia i latou sa pu noua`i, sa galulue fesoasoani i lenei galuega sa `ili`ili, aemaise o latou taimi, o lo latou afupa`u fa`apea ma la la tou lagolago malosi na fa`ai`uina ai ma le manuia lenei taumafaiga. O le sini mo le gagana Samoa, e tusa ai ma lenei galuega sa `ili`ili, o le`a fesoasoani tele ina ia mautinoa o le gagana Samoa, o le gagana lona tolu lea i Niu Sila i lona tulaga fa`aaoga ina i aso faipea, o le`a fa`aauau pea ma ia mausali lona tu laga tau-atina`e.